

# Sut terra cun chautschas sut!

Cumprovar la vitalitad dal terren cun in bategl da mangola en il terratsch

ANDREAS CADONAU/FMR

**P**roximain vegn jau forsa a chavar en bellas chautschas sut sin il bel plateau sulegliv da Vuorz. Tge? Chautschas sut? Quai n'è nagin spass d'emprim d'avrigl!

**A** partir dals set d'avrigl 2021 vegnan sutterradas sur l'entira Svizra 1000 chautschas sut. Ina sutterrada accumpagnada da scienzias e scenziads, tranter auter da la Universitad da Turitg e dad Agroscope, l'institut federal da perscrutaziun che sa fatschenta cun agricultura, nutriment ed ambient. Ils iniziants da l'acziun han tschertgà 1000 ortulans da hobi e puras e purs pronts da sutterràr in per chautschas sut. In u l'auter ha forsa s'annunzià per dismetter legal in pèr bategls vegls. Però quella u quel è vegnì trumpà: Metter sut il terratsch svizzer pon ins sulet chautschas sut alvas da mangola. E quellas vegnan messas a disposiziun dals iniziants inclus in manual cun indicaziuns exactas co sutterràr il bategl. Il lieu dastgan ils participants eleger sez. Silmain quai.

**L**'idea che tuna in zichel sco acziun da vender chautschas sut



posseda senz'auter aspects detg interessants. Tenor las explicaziuns da la pagina d'internet «beweisstück-unterhose.ch» regorda l'equipa da project da la Uni da Turitg e dad Agroscope al terren sottape a l'uman. In terren che garantisce la vita sin noss planet, furnescha nutriment, firtrescha l'aua, protegia da privels da la natura ed anc bler auter. Però il terren è era periclità da surbajegiadas ed agricultura intensiva. A moda nunconvenziunala vul la scienza eruir la vitalitad dal terren svizzer. Là nua che differentas spezias vi-

van en pliras stresas e garanteschàn vita grazia a lur activitad.

**T**erra è bler dapli ch'in pugn plain merda, e quella merda sa differenziescha fitg dad in lieu a l'auter. Pli activs ch'ils abitants en l'etascha sut noss pes è, e pli fritgavèl è il terren. A moda inspìranta e nunconvenziunala vul la scienza far attent a la valur ed impurtanza dal sutterràn. Tant pli activa che la vermaniglia, bacterias, bulieus ed anc bleras autras spezias èn durant la stad, e pli pauc che resta enfin l'atun da las bellas

chautschas sut. Las chautschas sut cumprovan la vitalitad.

**S**a chapescha che la scienza avess pudì metter a disposiziun ina chamischa alva da mangola per surdar ella al terratsch. Ma quai n'avess probabel strusch procurà per la medema atenziun sco l'idea da sutterràr chautschas sut. «Sut cun chautschas sut», quai tuna bain meglier. La gruppa da project scriva dad esser sorprendida dal resun gia avant che sutterràr las emprimas chautschas. Finamira cuntanschida.

**E**damai ch'els tschertgan anc puras e purs pronts da participar a l'acziun hai jau m'annunzià. Jau fiss natiralmain losch d'astgar sutterràr chautschas sut en terra rumantscha e speresch fitg che l'Uni Turitg ed Agroscope dettian suatientscha a mia dumonda. En glieg cas, cuntinuaziun suonda forsa cun ina reportascha.

**S**a chapescha ch'igl è ferm scumandà da purtar las bellas chautschas sut alvas da mangola avant che sutterràr ellas. Quai pudess influenzar essenzialmain ils resultads da la retschertga scientifica.